

〔清〕邊連寶 著

邊隨園集

第三冊

中華書局

〔清〕邊連寶 著

邊
隨
園
集

第三冊

中華書局

隨園詩集卷三十七

庚寅正朔〔一〕

一天瑞靄徹層霄，好是皇家喜氣饒。上相手麾清瘴海，蠻王額土款天朝。風融秋雪舒梅萼，春入新年上柳條。遙識五雲最深處，百僚師濟奏簫韶。

濁醪清酒雜然陳，生菜堆盤簇五辛。老子行年開八帙，孫男繞膝足三人。朱門白屋均逢泰，天上人間共得春。七字頭銜君若笑，太平世界舊蒼民。

〔一〕此詩稿本二首，刊本僅選第二首，第一首據稿本補。

哭嚮禧姪四首〔一〕

庭幃其孝友，學業亦崢嶸。應使吾宗亢，不圖爾命傾。椿萱雙白髮，黼黻一孤嬰。老淚如珠貴，緣君涕泗橫。

館穀獨饒裕，何曾蓄一錢。弟兄供匱乏，喫着絕華鮮。薄習中平人久，群情歡汝賢。只今無老禪，相對各潸然。

衣鉢曾相付，擔荷幸有徒。兩年如許促，吾道合應孤。遠抱期隆古，豪情鄙俗儒。隣君賁志歿，科第事猶粗。姪中己卯鄉魁，以犯聖諱並字句除險僻，停會試五科，期甫滿而遽殞。

先生制禮服，恪守那容過。叵耐心怨極，其如親盡何。余與其父爲同高祖兄弟。祇緣君輩少，詎是我情多。
樂府遺箋在，含悽不忍哦。姪爲余注《無雙譜樂府》一卷。

〔一〕此詩稿本四首，於刊本在《繼針操三章》後，題《哭嚮禧姪》，僅選第一、二、三首。

贈李鑒塘張方子絕句〔二〕

五十年來劇苦辛，未應吾道絕傳薪。寒家小阮（嚮禧）云亡後，李四張三是替人。

〔二〕此詩刊本無，據稿本補。

腹膝心三首

適與高方什閒談中，有所感，因做淵明《形影神》戲作《腹膝心》三首，呈方什，以博一笑，不足外人道也。

與君有夙契，一體同附著。高卑既殊位，貴賤應異爵。爾效拳曲勞，我享彭亨樂。茲亦爾所應，於義難護托。奈爾性崛強，轟然立之卓。董項與陶腰，惟肖不待學。頓使我一生，日惟貯藜藿。不見溫飽

徒，用爾代雙腳。

右腹贈膝

職分固云然，亦論應與叵。奈何使僂屈，但以博渠果。我屈惟三大，此外無一可。爾命合虛枵，故令附於我。爾欲飫肥甘，乃使我折挫。北道而南轅，其勢固已左。爾雖受顛頤，有妨我破礫。勸君稍安恬，無爲太鄙瑣。

右膝答腹

我爲百骸主，疇敢拘吾令。實緣我支撐，非關膝挺勁。腹非尺寸膚，腹瘡我亦病。非不卹爾饑，爭如天所定。彼蒼有大力，所定人難勝。金谷終滅崇，銅山不救鄧。匍匐而蛇行，僕僕空奔競。寄語屈膝者，毋躁且安命。

右心釋

水仙(二)

澆灌曾經三五月，七枚蓓蕾始胚胎。轉愁七萼同時放，爲囑商量續續開。

〔一〕此詩刊本無，據稿本補。

次韻酬高法意見懷三首〔一〕

交訂傾蓋間，神理了無隔。如何雲與龍，上下有離即。忽枉惠瑤篇，古道照顏色。離索難可堪，聊慰風雨夕。

典午趨日下，凌夷至玉臺。緬惟漢魏風，邈矣何遼哉。向者讀大著，心目爲一開。古源誓欲汲，今態已匪諧。荒塗眇蕭瑟，芳型信可懷。

末俗侈已久，乃欲遇汗尊。鑿枘故乖隔，吾道合理淪。願領我輩憤，所欣在雅存。相期崇所尚，習俗徒云云。

〔一〕此詩刊本無，據稿本補。

夏日漫興〔一〕

畏日殊難近，炎天不可當。衣冠真桎梏，枕簟有羲皇。庭草蘇時雨，苔花鏤古牆。蟬吟渾未歇，也愛晚風涼。

〔一〕此詩刊本無，據稿本補。

詠懷兼戲呈立軒〔一〕

憑化乘流任逝川，渾忘今夕是何年。陸翁合得偏稱放，米老無勞苦辨顛。曉貯情風襟袂裏，夜遙明月枕函邊。白家影舞耽蠻素，果否能歸《堯率天》。

〔一〕此詩刊本無，據稿本補。

夏夜〔二〕

齊紈空在手，手倦已停搗。樹杪涼颼颼，披襟一受之。魄盈星焰失，霄霽露華滋。夜氣聊蘇息，徘徊睡轉遲。

〔二〕此詩刊本無，據稿本補。

槐〔一〕

蜜課秋尤急，槐花夏已黃。啾啾喧日午，采摭奉蜂王。密蔭垂茅屋，樛枝拂短牆。慨然思手植，三百度星霜。

〔一〕此詩刊本無，據稿本補。

自贈〔二〕

不朝不市一閒人，大署頭銜草莽臣。萬事無營度甲子，三彭何懼守庚申。黃粱米糙聊充腹，白苧衫輕且稱身。擬似唐虞嫌晚近，相君真是葛天民。

〔二〕此詩刊本無，據稿本補。

對酒

朔望朝昏便改顏，那須寒暑屢推遷。老來歲歲黃楊閏，醉裏人人陸地仙。萬慮都空憑塞馬，一杯獨把聽風蟬。卻看掘閣蜉蝣物，作意翻飛亦可憐。

夏日遣興〔一〕

蓬蒿繞屋亦陰森，矮戶低窗暑不侵。陋巷雖無長者轍，陳編卻見古人心。詩篇遣興惟求穩，灑盞澆愁不厭深。酒罷詩成誰屬和，斜陽碧樹有蟬吟。

〔一〕此詩刊本無，據稿本補。

生計

老來俗務轉紛拏，似昧浮生漸有涯。防歉禦冬收菽菜，醫聾裝枕掃槐花。神仙不廢調丹鼎，富貴仍聞結柳車。隨分經營爭免俗，未應吾道有疵瑕。

再贈鑑塘方子^{〔一〕}

派別流分自古今，旁門偽體苦浸淫。百年肝腎存千首，萬口褒譏撫寸心。末學但期容澤好，先民務植性根深。一肩風雅邱山重，二子行行庶可任。

〔一〕刊本題《贈李鑒塘、張方予》

午睡^{〔一〕}

久辭滾滾座中苦，爲望駒駒睡裏甜。已穩繩牀安瓦枕，更鬆麻縷放蓬簾。病腑微生醉後渴，烹茶細檢雨前尖。卻憐紅軼東華客，清福如劍所轉廉。

〔一〕此詩刊本無，據稿本補。

夏日即事

髻絲煙篆繞微茫，紙帳蒲莞午夢長。逐婦鳴鳩方噪聒，將雛歸燕已踉蹌。雲如走馬花陰失，雨似拋錢土氣香。向晚谿邊看靄色，碧天萬里艷斜陽。

夏夜獨坐（一）

大暑來時夜漸長，幽深小院足徜徉。耳塵轉借蟬聲滌，鼻觀如聞草露香。星密預占來日熱，風輕聊趁片時涼。一鉤新月清如許，不信茅簷遜畫堂。

（一）此詩刊本無，據稿本補。

論詩

個事無營爭得過，閒窗抱膝日長哦。逃禪難並拋文字，學古愁仍落臼窠。體貌循聲天趣減，雲飛川泳化機多。乾坤錦繡昂頭見，大塊文章永不磨。

紛紛古籍腹中藏，百煉千研化爲霜。懶向陳人拾剩唾，直從靈府發奇光。錢歸掌握都從貫，金入鑪錘那不祥。具得別才思廢學，蒼生誤盡笑滄浪。

人言窮極乃工詩，此理於今信不疑。紈袴原非風雅料，勳名但作鼎鐘資。孤臣孽子懷君父，思婦勞人

念別離。約略都從窮裏得，千秋一刻更奚辭。

先生問俗采風詩，心畫心聲近轉疑。但說鴉身無鳳喙，也防雉骨裏妍皮。少陵忠孝真千古，太白風流亦一時。謾訝鈴山文體變，渠家底裏是青詞。

苦雨四首_(一)

禾黍高低遍，霖霖朝夕連。下田成澤國，杲日祝蒼天。糙米騰昂價，營薪鬱濕煙。便從今夜止，也復減豐年。況乃無休歇，積陰暗不開。冰輪纔逗漏，雷鼓已喧豗。側耳牀仍滴，驚心壁又頽。朝來著屨屐，渾欲長莓苔。誰挽銀河水，居然建屋瓴。空場沉碌碌，大壑走風霆。柱礎中墮中墮，菌之大者，見《爾雅》。紫，牆匡宿草青。晚來飛陣過，氣似帶龍腥。

偏側復偏側，中情慘不歡。蜀天真欲漏，后土幾時乾。濁酒壺偏罄，良朋面轉難。斜陽忽閃爍，懷抱若烏寬。
_{〔一〕稿本題《苦雨》。}

題商童初明府畫人物_(二)

朱翁子

爾時都擬溝中瘠，異日驚看半綬新。俗眼大要多覲近，豈徒羞墓墓中人。

謁髯公

攜妻竄人扶餘國，鯤化鵬搏大海濱。一妹李郎齊下拜，吾兄誓不作人臣。

紅線

一縷天風吹珮環，旌旗獵獵魏城邊。鉤金合子誰偷得，五色雲中捧劍仙。

東坡

不合耕田兼識字，那能戴笠與披蓑。中臣要害片言耳，腸斷瓊州春夢婆。
坡詩：「我是識字耕田夫。」圖中戴笠。

〔一〕此詩刊本無，據稿本補。

紀夢〔一〕

日吟天姥李詩誦天臺，孫賦心結芙蓉面面開。遙想蓬萊失左服，驚傳靈鷲忽飛來。潤邊瑤草盈懷袖，洞口流霞入酒盃。夢裏自矜凡骨蛻，翩翩孤鶴出塵埃。

〔一〕此詩刊本無，據稿本補。

秋光^{〔一〕}

秋光不可寫，欲擬轉徘徊。幽影耿疎箔，清陰冷積苔。長天惟一碧，萬里絕纖埃。神理終難貌，將奚舉似哉。

〔一〕此詩刊本無，據稿本補。

隨園詩集卷三十八

庚寅中秋，同九兄玩月，因憶李、郭二子去年在座者〔一〕

耆舊年來半喪亡，巋然二老魯靈光。已欣聯榻眠三載，余於丁亥歸自新安，與兄時相聚首。又看中秋月一場。
丁亥詩云：「白頭兄弟中秋月，此後知同年幾迴。」北斗南箕均匿彩，金風玉露欲爲霜。去年詩客今何處，抱病居憂兩可傷。李居憂，郭抱病。

〔一〕此詩刊本無，據稿本補。

王學山過訪〔二〕

閒炙秋簷背，忽傳老友過。十年剛一面，雙鬢已全皤。絕塞來鴻雁，西風灑薜蘿。不堪重話舊，回首欲悲歌。

〔二〕此詩刊本無，據稿本補。

齒盡戲作

齒從今後但餘三，句是三年前所詠。不料一年必墮一，以次而墮今已竟。當第三齒既墮時，此心怛怛不自定。一念頓生領嘆癡，以理奪之不能勝。已而自鄙還自嫌，此事真堪作話柄。齒之職原在咀嚼，一齒豈足供使令。故非剥果縱強留，詎似蒙泉能再迸。端木尚欲去餽羊，叔達何須顧破甑。或云齒落可更生，黃髮兒齒詩可證。又云兒齒壽之徵，余謂前徵非後應。當其兒齒既生時，向後歲月無多剩。既生兒齒將作兒，人家將有充閭慶。譬如梅李忽冬實，可卜根株早已病。來年百卉盡萌芽，唯冬實者難與並。又如日已薄崦嵫，餘光忽作桑榆映。轉盼陽烏大海沉，黯慘不復辨塗徑。齒落雖有更生理，我竊不願生之更。但囑子婦與女孫，肉之大者餅之硬。梨棗榛栗菱芡蓮，一切休從食案釘。試張吾口一驗之，柔者仍存剛已罄。

前乾隆己未，余謂芥舟云：「我年四十矣，竊喜『白髮』字可以入詩。」芥舟爲之失笑。年來惟餘一齒，私擬此齒盡時當得佳作，今而果然。他日錄貽芥舟之子廷模，令其焚告芥舟，九泉下應捧腹軒渠也。 隨園自記〔一〕

〔一〕詩後邊氏自記，刊本無，據稿本補。

哭李亦珊表叔兼唁公子陽林、姪珠林兩表弟並叙〔一〕

公姪珠林官浙之上虞，公與俱往，以六月六日卒於虞署。子陽林體素羸，兼有失血症，珠林

恐其以奔喪故，勞瘁委頓而致滅性，故秘不以聞。擬於秋後煩至親與健僕將柩以歸。然客之自南來者傳聞不一，即戚友間非不互相驚詫，究疑而未敢深信也。孰意至此月廿一日，珠林之母田太安人又以疾卒於家，爰遣急足往訃。迨急足者回，珠林不能終秘，遂於九月廿五日得公凶問的耗。陽林急欲奔赴，而母邊儒人所阻。蓋珠林瓜代既畢，即應起程。或水或陸，未審何由。陽林縱往，又恐其相左。然則他日之歸也，珠林將以奔母喪而兼扶叔觀矣，不亦重可哀耶？故詩之卒章並唁二子。

迢迢水陸四千里，凶問傳來聽乍驚。水落一朝真見石，心懸兩月似搖旌。吟魂應怯江楓冷，好夢翻從的耗生。昨夢與公晤，宛若平生。最是秋窗殘月夜，愁聞嘹唳雁南征。

俠腸豪興兩崢嶸，濃似春雲蓬勃生。到處朋儕傾意氣，一時聲價動公卿。井中投轄朝留客，月下徵歌夜炙笙。偶過西州思往事，羊曇惟有淚縱橫。

擅場書法重千秋，勁正時還兼秀柔。墨客祇今垂玉筍，藝林從此失銀鈎。詩翁曾許題生壙，余嘗欲作生壙。公許題隨園詩老之墓，然竟未果。墓道誰堪勒故侯。公曾爲西林令。歡息廣陵散已絕，家家什襲作刀球。

北望燕雲黯不開，羈魂應上越五臺。娥江忽作騎鯨去，遼海何常化鶴來。氣可凌霄真共許，田無負郭亦堪哀。更憐弱息艱奔竄，小阮衰麻扶觀回。公卒於姪珠林上虞令任所，子陽林家居孱弱多病，公彌留囑姪勿即報聞，恐其匍匐奔喪，哀勞滅性也。適珠林亦丁內艱，遂扶叔柩歸里。

〔一〕刊本此詩無序，題下亦無「並序」二字，均據稿本補。